

# NDI UMUNYARWANDA

## ISOBANURAMPAMVU KURI GAHUNDA YA “NDI UMUNYARWANDA”

### IRIBURIRO

Amateka y'u Rwanda mu kinyejana gishize yiganjemo byinshi byabangamiye isano hagati y'abanyarwanda.

Uko ubuyobozi bwagiye buhindagurika kuva mu gihe cy'abakoloni na nyuma yaho, imbaraga zabwo zakomeje kubakirwa ku macakubiri yagize ingaruka ku mibereho n'imibanire y'abanyarwanda. Muri izo ngaruka twavugamo: ubuhunzi, guhezwa kwa bamwe ku byiza by'Igihugu, kwironda mu buryo butandukanye, ubwicanyi n'intambara byaje gusozwa na Jenocide yakorewe Abatutsi mu w'1994.

Inzira ndende yo kongera kubaka ubumwe bw'Abanyarwanda yahereye ku kubohora igihugu no guhagarika jenocide. Ihame ry'ubunyarwanda ryahawe agaciro, hagiyeho Leta y'Ubumwe bw'Abanyarwanda, uburyo bw'imiyoborere busangiwe na bese, no kubaka inzego zishimangira kandi zigashyigikira ubumwe bw'abanyarwanda nk'uko buteganywa n'Itegeko Nshinga ryo muri Kamena 2003.

Muri urwo rugendo, Abanyarwanda banze kuba imbata z'amateka bimika umuco w'ibiganiro bashaka ikibubaka nk'abantu, kikubaka n'Igihugu muri rusange. Urugero ni nk'ibiganiro-nyunguranabitekerezo byo mu Urugwiro byabaye Gicurasi 1998 kugeza Werurwe 1999, byatanze icyerekezo mu kubaka Igihugu (Nation), harimo Politiki y'Ubumwe n'Ubwiye bw'Abanyarwanda, Imiyoborere myiza, Umutekano, Ubutabera, Inkiko Gacaca n'Icyerekezo 2020.

Uwo muco w'ibiganiro byubaka kandi bifasha Abanyarwanda kwikemurira ibibazo wakomeje gushinga imizi no mu zindi nzego zinyuranye. Mu gukomeza guharanira ko ibyagezweho biramba, ni ngombwa gushingira ku ihame ndakuka ry'Ubunyarwanda (Rwandan Spirit).

Zimwe mu ngamba zo kubaka ubunyarwanda, ni gahunda ya “**Ndi Umunyarwanda**”, igamiye gutoza abanyarwanda kwiyumvamo ubunyarwanda mbere y'ibindi, kubana nta rwikekwe no gushyira inyungu rusange n'iz'igihugu mbere y'inyungu bwite, binyuze mu rubuga rw'ibiganiro bagirana mu bwisanzure. Uretse umurimo ukorwa cyane binyuze muri Komisiyo y'Igihugu y'Ubumwe n'Ubwiye, hari n'izindi ntambwe zatewe n'indi miryango muri uru rugendo rwo kubaka ubunyarwanda.

Unity Club Intwararumuri yateguye ibiganiro bitandukanye biganisha ku kwimakaza ubunyarwanda. Ibiganiro nk'ibi byateguwe kandi na Fondation Imbutu mu mahuriro y'urubyiruko atandukanye. Ibi byerekanye ko Abanyarwanda twiteguye gutera indi ntambwe, kandi bitanga impuruza

yo gushaka uko gahunda ya “Ndi Umunyarwanda” yagera kuri bese.

### I. “NDI UMUNYARWANDA” NI IKI?

**“Ndi Umunyarwanda”** : Ni ukwiyumvamo isano ihuza Abanyarwanda batewe ishema no kuba Abanyarwanda

bahuriye ku gukunda u Rwanda, kururinda no kuruteza imbere. **“Ndi Umunyarwanda”** ikubiyemo ingingo eshatu z’ingenzi: kwiyumvamo ubunyarwanda (*Rwandan spirit*), indangagaciro na kirazira bigamije kwimakaza

ubunyarwanda.

### ***1.1 Kwiyumvamo ubunyarwanda (The Rwandan Spirit)***

Ni ukwemera kuba uw’u Rwanda, rukaba urwawe, ukarubamo narwo rukubya, ukarutura, ukarukunda, rukakurera kibyezi, ukamenya kururinda, byaba ngombwa ukaba wanarwitangira; iyo sano ikaba igihango kizira gutatirwa ubuziraherezo.

### ***1.2. Zimwe mu ndangagaciro z’ubunyarwanda***

***Gukunda u Rwanda n’Abanyarwanda no guhora iteka azirikana kuzaraga ababyiruka Igihugu cyiza.***

Ukunda iwabo ahazirikana iteka, akaharinda icyago, akahagwiza ibyiza. Ingobyi iduhetse ni iy’agaciro, turayishinzwe. Aho ujishe igisabo ntuhatera ibuye. Byongeye kandi, nta waraga abana be ibyamunaniye. Niyo mpamvu gutunganya Igihugu no kubaka ejo hazaza hazira amacakubiri ari inshingano kuri buri munyarwanda.

***Kuba inyangamugayo*** irangwa n’ukuri, ubworoherane, kwicisha bugufi, gutega amatwi, gutabara no gutabarana. Ibi ni byo bituma ukwizerana gushoboka.

***Kugira umuco wo kuganira no gusesengura mu gukemura ibibazo.***

“Ndi Umunyarwanda” idusaba guhora dushaka ukuri ariko tukabikorana ubworoherane nta guhutaza, tukemera aho twagize intege nke tukabisabira imbabazi tugamije kujya imbere.

***Guharanira icyateza imbere u Rwanda n’Abanyarwanda.***

Ni ngombwa ko buri munyarwanda agira uruhare mu bikorwa bigamije guteza igihugu imbere bikaba umuco ku buryo buri munyarwanda abyibonamo kandi bikaba ishema kubigiramo uruhare.

### ***1.3 “Kirazira” muri Gahunda ya “Ndi Umunyarwanda”***

***Kirazira gusumbisha inyungu bwite inyungu rusange***, bikaba ari nabyo bituma bamwe bashobora gusenya ibyubatswe ku kiguzi gikomeye byasabye Abanyarwanda;

***Kirazira kuba ibikoresho by'imigambi mibi*** ku Rwanda n'abarwo;

***Kirazira kugira ingengabitekerezo ya jenocide n'amacakubiri***, urwango, inzika... no kuyitoza abana tubyara kuko bibabera umutwaro uremereye w'ibyo batagizemo uruhare.

## **II. INTEGO Z'IBI BIGANIRO**

### ***II.1. Intego :***

Gukomeza no gukwirakwiza umuco w'ibiganiro bishingiye ku kuri dushimangira ubumwe n'ubwiyunge, twubaka "Ndi Umunyarwanda"

### ***II.2. Umusaruro utegerejwe kuri gahunda ya "Ndi Umunyarwanda".***

Abanyarwanda biyemeje kubaka ubunyarwanda no kuburinda.

### ***II.3 Umusaruro utegerejwe muri ibi biganiro:***

Abaje mu biganiro bumvise kimwe gahunda ya "Ndi Umunyarwanda" n'icyigamije. Abaje mu biganiro batangiye kwitekerazaho, batekereza uko buri muntu ku giti cye yakubaka ubunyarwanda.

- ✓ Abaje mu biganiro batanze inama uko gahunda y'ibiganiro bya "Ndi Umunyarwanda" yakomeza aho batuye kandi bijyana n'ibikorwa.
- ✓ Abitabiriye ibiganiro biyemeje kwiyubakamo umunyarwanda ufite indangagaciro zirangwa no kwigirira icyizere, gukunda igihugu, kugiteza imbere no guharanira ko ntacyagisubiza inyuma.

### ***II.4 Imigendekere y'ibiganiro:***

Ibiganiro kuri "Ndi Umunyarwanda" bizasemburwa n'ibiganiro bikurikira:

- Ikiganiro ku mateka y'u Rwanda.
- Ikiganiro ku nzira ndende y'Ubumwe n'Ubwiyunge mu Rwanda, kuva muri 1994.

### ***II.5 Imyitwarire mu kuyobora ibiganiro kuri "Ndi Umunyarwanda":***

Kubahana, ukuri n'ubworoherane, kwizerana abantu bakiha umwanya wo gutega amatwi no kumva abandi.

- Gutanga urubuga rwo kuganira mu bwisanzure (gutanga ijambo kuri buri wese ariko no kutarihatira utarisabye).
- Gukumira amagambo akomeretsa, agamije kwirwanaho gusa cyangwa kwigurira shusho (kwigira mwiza, kugabanya ubuhemu) mu bamwumva.
- Kumenya gutanga umwanya wo kwiganiraho ariko nta kwibagirwa kuwusaranganya (kwirinda abizimba mu magambo).
- Gukorera mu matsinda aho byashoboka.
- Gufata ingamba zo gushobora kugoboka uwahungabana.

## UMUSOZO

“Ndi Umunyarwanda”, ni ukugaruka kw’isoko y’ubunyarwanda, isoko yacu yahemukiwe igihe kirekire mu kinyejana gishize (Abakoloni, Repubulika zishingiye ku macakubiri no kubiba urwango bigera na kuri jenocide). Ni inzira ndakuka y’ ubumwe n’ubwiyunge akaba ari urugendo rurerure rusaba guhozaho n’ubufatanye bw’inzego zose. Ni yo mpamvu uru rugendo ari rurerure. Dutangije iki gikorwa tunitegura Umushyikirano, tuzakomeza na nyuma y’umushyikirano ndetse no mu gihe twitegura kuzibuka imyaka 20 ya jenocide yakorewe Abatutsi n’ukwibohora kw’Abanyarwanda.

Ingamba zo kongera kubaka imibanire myiza zigomba kujyana n’impinduka mu myumvire, mu mibereho no mu bukungu.

*“Ntidushobora gusubiza igihe inyuma cyangwa ngo tuvaneho ibibi byatubayeho ariko dufite ubushobozi bwo kugena ejo heza hazaza h’u Rwanda no gutuma ibyabaye bitazongera kuba ukundi...” “Kuba umunyarwanda muzima ni yo politike twese dukwiye kugenderaho. Politike y’ikinyoma yishe u Rwanda, Afurika n’isi muri rusange. Ntabwo twe Abanyarwanda twapfa kabiri. Twapfuye rimwe kandi rirahagije. Byaba ari ishyano twemeye gupfa kabiri. Kudapfa bwa kabiri rero turashaka abanyarwanda b’abayobozi bazima bumva ko tutapfa kabiri...”*

***Nyakubahwa KAGAME Paul, Perezida wa Repubulika y’u Rwanda.***